



學種番薯

「番薯好改哩啲，遽遽去改喔！」下班轉屋，隔壁改番薯正轉个伯姆，就提醒佢講，吾番薯好改哩！「毋係講愛種有四隻月正做得改？」佢疑狐問伯姆。「若番薯毋係同吾个差毋多時節種个？好改哩，無會臭忒！」佢恁想新曆八月，當多人去過情人節該日，翻壟、插枝種落泥竇肚个番薯，既經有三隻零月，無想著恁遽就有好收成也。

一入屋，煞煞著好靴筒、擎等鏟頭，同伯姆分一隻肥料袋，就大步行向番薯園。該番薯園就在南庄農會家政班後背，係好心个阿發伯姆喊大家去種个。該係新曆七月時節，阿發伯姆喊阿發伯，駛打田機同自家个田打好來，再喊附近个人來種菜種番薯。今年年初，就同鄰舍講好，係有好種，佢乜愛去種看啊！結果佢運氣當好，敗勢！講毋著，係大家當好心正著！就分著阿發伯个半坵田來種，該係佢第一擺種番薯。

記得該日天時當好，打早佢就擎等一支鏟頭、戴等一頂笠嘛、拔等一條 tau-lu，攞一罐滾水，就去田項打番薯壟。去到田項，看脣頭阿伯打好个番薯壟，目珠鑑過厥个壟有幾闊、泥肉有幾賁，有樣學樣，鏟頭改起兩片个泥。一朝晨，就分佢翻出三條像樣像樣个壟。臨暗頭，知佢愛種番薯个阿和伯姆，摺佢準備好兩百藤个番薯莖，佢就煞煞一藤一藤同佢楔入番薯壟，就恁樣佢完成地種番薯个「大事」。

等到蕃薯藤綻出新葉、遞出新藤，差毋多一個月過後，就愛入肥。講著入肥，毋係同肥料放到蕃薯壟頂項就好，哪有恁該食？係愛同粒仔肥入到兩片个泥竇肚！愛放入泥竇肚，就愛開廂！在壟个兩片析，鏟頭刺(qiag)出溝仔，左片一條、右片一條，放入堵好个粒仔肥，再同泥摺轉去，就完成地入肥个事頭。兩三隻月過後，等到蕃薯藤遞到兩手打開恁長，就愛「牽藤」，同長長探根个蕃薯藤，對左片牽到右片，再同右片个牽到左片，免得搶食番薯過多个肥料、養分。

對改壟種番薯、入肥牽藤、擲草蔭水到有番薯好改，三隻零月个時間，分佢有機會學習著仰般種番薯。這，第一擺个經驗，裡肚包等耕種人个智慧，還有淦淦个莊下人情味，定著，會分佢感動、想念一生人！

作者：邱一帆

☆詞彙學習☆

【改番薯】goi` fan` su`：挖掘、收成番薯。

【恁該食】an` goi` siid：這麼容易吃，比喻事情很簡單。

【打田】da` tien`：耕種前，將田中泥土翻覆整平。

【揸】eb`：掩埋。

【tau-lu】lau`lu`：毛巾。

【蔭水】im sui`：引水灌溉。

【幾賁】gi` pun`：多厚。

【淦淦】nem` nem`：滿滿。

【楔入】xiab` ngib：斜插入縫。

☆文法學習☆

【無會臭忒】mo` voi` cu ted`：不然會(被蟲蛀而)發臭。「無」在這裡是「不然、否則」的意思，表示若不依照條件、達成要求，就會導致某種後果。相似的用法為「係無(如果不這樣的話)」。

另例：早啊睡，無斯會蹶毋起喔！（早點睡，不然可會起不來喔！）